

[0]涼茶舖嘅Happy Hour

[1]香港天氣好熱，又成日落雨，好易就會令人覺得周身唔舒服，特別係熱氣嗰陣。

隔離黃叔叔就係噉，所以佢會過嚟飲涼茶。佢攞起一碗廿四味飲到底，飲完就擺低個碗同埋一張十蚊紙。廿四味好苦，所以樓上黃師奶嚟到淨係會飲五花茶，五花茶冇咁苦，黃師奶話飲完好舒服。

賣晒舖頭前面張枱上面嘅涼茶之後，爺爺又喺茶壺倒返一碗碗出嚟。然後佢叫埋我一齊行入舖頭後面，幫佢將啲藥材加落去一大煲水入面煲。爸爸返工嗰陣，我就會喺爺爺間涼茶舖幫手。過咗冇耐，嗰一大煲水就變咗深啡色，仲傳嚟好香嘅中藥味。

我最鍾意嘅都係茶葉蛋嘅香味，爺爺每次煲好一煲，都會攞一個畀我食。我就坐喺天花板嘅大風扇下面邊食邊吹涼風。把風扇已經用咗好耐，另外地下嘅綠色紙皮石地板、木枱檯同埋裝涼茶啲銅壺，都係由爺爺細個開始用到依家。

我食緊茶葉蛋嘅時候，爺爺就會喺隔離同我講以前嘅故仔。喺二十世紀初嘅時候，爺爺嘅爺爺為咗逃避戰亂而嚟到香港，住咗喺黃大仙。當時社會大家都好窮，有感冒唔舒服就唯有飲涼茶。因為爺爺嘅爺爺本身係做中醫，所以時不時都會幫人睇病。佢有一條祖傳秘方，最後仲開埋呢間涼茶舖。

爺爺話佢細個嘅時候都會幫佢爺爺煲涼茶，由朝做到晚。嗰陣時嘅涼茶舖有好多人，大家一邊飲涼茶一邊傾計。入面仲有電視機同點唱機，啲人會嚟睇電視同聽歌。附近又有好多賣日用品嘅地攤同埋賣小食嘅檔口，好墟口。但係依家啲後生仔唔飲涼茶，佢哋都係鍾意飲珍珠奶茶同水果茶多啲。

我想像唔到爺爺所講嘅黃金時代究竟係點樣，因為依家會嚟涼茶舖飲涼茶嘅人越嚟越少。最近，周圍好多舊舖頭都開始門門唔做生意，亦都多咗啲反對標語，又有街坊陸續搬走。我聽啲人講話呢區就嚟要重建。

之後有一日，有幾個著住西裝嘅男人嚟到，話要搵爺爺傾關於間涼茶舖嘅事。嗰晚，爸爸同爺爺傾咗好耐，爸爸想爺爺賣咗間舖，留返啲錢送我去外國讀書，爺爺最後應承咗。

之後我問爺爺會唔會捨得間涼茶舖，爺爺調轉頭問我：「你覺得涼茶係咩味？」我話：「係苦嘅。」爺爺話：「涼茶一飲落口你會覺得苦，但係飲完之後你個口會有回甘，你會覺得係甜嘅。」

涼茶舖頭上面把大風扇一直轉呀轉，轉到開始有啲噪音。我同爺爺講話我想間涼茶舖一直做落去，但係爺爺同我講話佢想有多啲時間同我周圍去玩。

00199:《涼茶舖嘅Happy Hour》Happy Hour at Herbal Tea Shop

The CC BY 4.0 license REQUIRES that any reused or repurposed content must have the correct ATTRIBUTION. Please use the text below in your citations, printouts and copyright pages.

Attribution Text

"Happy Hour at Herbal Tea Shop" (Cantonese), written by 懸壺廬, Illustrated by Sophie Liu (@randomsofui), published by HamBaangLaang (© HamBaangLaang, 2022) under a [CC BY 4.0](#) license on hambaanglaang.hk
Music: Heavenly - Aakash Gandhi

[Find out more here: [HamBaangLaang Attribution terms and CC 4.0](#)]
